

Di Universidad pa Esso Libya un caminda largo y yen di obstaculo



ORANJSTAD -- Lesadonan di mi articulon lo ta corda mi odisea pa yega Universidad di Cansa biahando cu tanker di Aruba pa Philadelphia y despues cu bus te Lawrence via Norman, Oklahoma. Despues di gradua na aña 1964, mi a pasa den un otro odisea, uno cu a dura mas di dos aña y cu a siña mi cu den bida hopi bes tin obstaculo inespera. Pero mescos cu Candide di Voltaire, mi a mantene semper mi optimismo y na final mi determinacion y perseverancia a triunfa y ami a keda un persona mas fuerte. Siman pasa mi a skirbi di e asignacion pa Sungei Gerong cu no a tuma lugar. Awe mi ta conta di un cu si a tuma lugar, pero na final a resulta un fracaso. Esaki ta e di dos parti.

Creole na Caracas, Venezuela Inmediatamente despues cu Indonesia a nenga di duna mi visa pa bay traha na Soengei Gerong, Esso Eastern a cuminsa busca un otro posicion pa mi. Un mensahe a bay pa tur sucursal di Esso na Merca y den exterior. Pa casualidad, mientras cu ami tabata studia na Kansas, Bill Murphy, mi exhefe na Lago, a bira Assis-

tent Comptroller encarga cu Computer Department di Creole na Caracas y asina cu el a tende cu mi tabata disponibel, el a laga busca mi pa yena un vakantie. Mi no a pensa dos bes. Mi tabata asina emocionada di por traha atrobe cu Bill, specialmente na Caracas caminda nos a experiencia e caida di Perez Jimenez apenas seis aña prome. Naturalmente e idea di ta staciona asina cerca di nos famianan na Aruba tambe tabata hopi atractivo. Un representante di Creole na New York a entrevista mi y confirma e acuerdo pa bay traha como Senior Systems Analyst den Computing Departamento na e oficina principal di Creole na Chaguaramos, Caracas. Bill mes cu su famia tabata di vakantie na Merca y el a invita mi pa bay keda na su cas tanten cu mi ta busca un lugar pa ami biba. Contrario cu awendia, Caracas na aña 1965 tabata un ciudad trankilo y sin peliger pa wordo atraca, secuestra of mata. E supermercadonan tabata yen di productonan local, Mericano y Europeo. Venezolanonan tabatin aprecio y cariño pa e 'monsieur', un nomber deriva di 'monsieur'



pa identifica tur homber stranhero. E restaurantnan tabata mundialmente conoci y relativamente barata. E famoso Aula Magna di Universidad Central di Venezuela tabata presenta conciertonan di artistanan mundialmente conoci; e monumentonan y edificacionan historico tabata atraccionnan cultural importante. Pa ami cu tabata un fanatico di baseball Venezolano e posibilidad di mira weganan na e Estadio Universitario di UCV tabata hopi emocionante. Pa un cambio di ambiente, un trip di un dia pa Colonia Tovar tabata suficiente. Pa un Arubiano cu tabata papia Spaño relativamente bon, traha pa Esso na Caracas na 1965 tabata manera un regalo di shelo. Di berdad cu e tempo ey Caracas tabata un di e luganan mas codicia pa e trahadonan di Esso. Mi no tabata sa cu e posicion cu ami a bay yena tambe tabata un masha codicia pa Americano y Venezolanonan den e departamento.

Aparentemente, tabata existi hopi resentimiento contra Bill Murphy pasobra cu el a laga busca un Arubiano ex Lago pa e puesto. E tempo ey, hopi empleado di Creole tabata mira Lago manera un yiu ilegitimo di Creole. Pa nan, e hecho cu Bill Murphy, un ex empleado di Lago, a nombra ami, otro ex Lago, tabata un advertencia di cosnan cu por a bin den futuro.

Den tal ambiente intrigando, desconoci pa mi, mi a yega Caracas net na tempo pa mi yiunan drenta Colegio Internacional 'Campo Alegre' na Las Mercedes pa e aña escolar 1965 - 1966. Entre tanto mi a haya un apartamento na Chuao cu tabata basta cerca di mi oficina. Tabatin papia cu Bill Murphy no a bolbe di su vakantie ainda pasobra el a bay sigui algun curso di Esso na New York. Na November Bill a bin bek cu e noticia cu el a haya un transferencia pa Madrid como Chief Comp-

troller di Esso España, un otro promocion pe.

Es nan cu tabata descontando cu ami a haya e puesto cu nan tabata codicia no a tarda pa cuminsa pa deshaci di e decision di Murphy. No a dura mucho cu mi a wordo avisa cu mi "no tin suficiente preparacion" pa e posicion cu mi a haya y esey mi empleo cu Creole ta caba dia 31 di december. Asina mi soño idilico a yega na un fin tristo. Tabata un experiencia inespera cu a laga un sabor amargo y cu a destrosa mi spiritualmente. Pero mi optimismo a convence mi cu cosnan lo drecha atrobe y cu curashi ami y mi famia a prepara pa e siguiente etapa di nos bida. Dia 31 di december 1965 nos a bula bay Aruba pa pasa 'tiro' cu nos famianan prome cu nos bolbe Merca. Otro siman, cu pasenshi y fe den nos mes, nos ta gana gloria. Manda bo come ntarionan@clydeharms@yahoo.com